



Posbus 7113, Newtonpark, 6055  
Telefoon (041) 3651233  
h/v Willetstraat en 4de Laan, Newtonpark, 6045  
E-pos: admin@lnpark.co.za /

*'n Blink toekoms begin hier!*

## NUUSBRIEF 31

# 13 September 2024

### UIT DIE KANTOOR

Geagte Ouers

#### **MEDELYE**

Ons opregte meegevoel word betuig teenoor Jordan Richards in graad 7O en sy familie met die heengaan van sy ouma verlede week. Mag hulle as familie die nabyheid van ons Hemelse Vader in hierdie tyd beleef.

#### **MEDELYE**

Ons opregte meegevoel word betuig teenoor Britney Norris in graad 6H en Nathan Norris in graad 7D en hul familie met die heengaan van hul ouma verlede week. Mag hulle as familie die nabyheid van ons Hemelse Vader in hierdie tyd beleef.

#### **BASAAR**

Dit was heerlik om te sien hoe soveel meer ouers hierdie jaar betrokke geraak het om van die basaar 'n reuse sukses te maak. Mens kon die warm atmosfeer in die saal voel. Baie dankie almal! 'n Spesiale woord van dank aan elke OOV-lid wat die dag voorgevat het.

#### **GRAAD 7-TOER**

Ons graad 7-leerlinge vertrek Maandag op 'n toer na die Suid-Kaap. Hulle sal hul rapporte by die skool ontvang wanneer hulle terugkeer. Ons hoop hulle geniet die opvoedkundige uitstappie terdeë.

#### **VERLORE KLERE EN GOEDERE**

Al die verlore klere, kosblikke, bottels, tekkies, ens. sal weer tydens die week van 16 tot 20 September op die stoep langs die saal uitgestal word. Kom kyk asb. as iets van u kind verlore geraak het. Daarna sal die klere en goedere aan behoeftiges geskenk word.

#### **SPORT**

Die leerlinge van graad 1 tot 6 gaan volgende week Maandag en Dinsdag in skooltyd kortafstande vir die kleure-atletiek uithardloop. **Hulle mag met LO-klere skool toe kom.** Daar is geen sport aktiwiteite na skool nie.

## **SOMERSDRAG: 1 OKTOBER (vlg. huiswerkboek: bl. 4)**

### **SOMER: (1ste en 4de kwartaal)**

#### **5.3.1 SEUNS:**

Skoolbaadjie met wapen is opsioneel, **maar verpligtend as 'n trui ook gedra word**. Grys kort- of langbroek. Wit oopknoophemp sonder das met skoolwapen op die sak. Laasgenoemde is verpligtend. Grys skoolkouse met skoolkleure by omslag moet gedra word. Die skoolkouse moet tot onder die knie opgetrek wees. Swart skoolskoene, verkieslik die sg. "Toughees".

#### **5.3.2 DOGTERS:**

Skoolbaadjie met wapen is opsioneel, **maar verpligtend as 'n trui ook gedra word**. Wit oopknoophemp sonder das. Maroen skoolrok (verkieslik van tetrexmateriaal) met maroen broekie. Skoolrok mag nie hoër as 8cm bokant die knie wees nie. Kort wit sokkies word gedra. Sokkies moet een keer omgeslaan word. Swart skoolskoene (toeryg of met bandjie), verkieslik "Toughees".

#### **5.3.3 SAAL**

Gedurende somer en winter is die dra van die skoolbaadjie tydens saalbyeenkomste verpligtend. Seuns moet hul baadjies se boonste knoop toeknoop.

## **2025 BEGROTINGSVERGADERING: 17 OKTOBER 2024**

Hiermee gee ons u 'n tweede keer kennis van die 2025-begrotingsvergadering wat op Donderdag, 17 Oktober 2024 om 17:30 in die skoolsaal gehou sal word.

Tydens hierdie ouervergadering sal die voorgestelde begroting vir 2025 vir oorweging en goedkeuring, met of sonder wysiging aan u voorgelê word.

Enige ouer of wettige voog van leerlinge in die skool het die reg om die vergadering by te woon. **Die begrotingsdokumente sal vanaf 19 September by die kantoor ter insae beskikbaar wees.**

## **ONDERSTEUNERSHEMDE**

Ons wil al ons ouers aanmoedig om vir u Laerskool Newtonpark-ondersteunershemde aan te skaf. U kan by ons klerewinkel kom aanpas, ons het nou voorraad ontvang en die koste is R380.

## **VAKANSIENASORG: SEPTEMBER 2024**

Die vakansienasorg gaan voort. Die voorgestelde tydperk is:

**1. Maandag, 23 September 2024 tot Vrydag, 27 September 2024 (4 dae. Dinsdag, 24 September is Erfenisdag). Skole sluit Vrydag, 20 September en begin Dinsdag 1 Oktober 2024.**

2. U moet asseblief ook onderneem om die nasorgtye nl. 07:15 tot 17:30, stiptelik te eerbiedig. **Die tarief beloop R90 per dag, per kind, en R360 vir 1 kind vir die 4 dae. Die bedrag vir 2 kinders is R670 vir die 4 dae, en is vir die volle tydperk, vooruitbetaalbaar. Daar is beperkte spasie. Sperdatum vir aansoeke is Vrydag, 13 September 2024.**

Indien u graag van die vakansienasorg gebruik wil maak, e-pos Mev. Laas by [fin@lnpark.co.za](mailto:fin@lnpark.co.za)

## **FACEBOOK-BLAD: SKOOLKLERE**

Die facebook-groep, SKOOLKLERE - Laerskool Newtonpark, bestaan steeds en dit is lekker besig daarop. Maak gerus van die gerief gebruik as u van skoolklere wil ontslae raak wat te klein geword het vir u kinders.

## LAERSKOOL NEWTONPARK FACEBOOKBLAD

Besoek gerus ons skool se amptelike facebook-blad, @LaerskoolNewtonpark.co.za, die blad se profielfoto is die skoolwapen. Dis lekker om na foto's te kyk en met ons leerlinge te spog. Bly ook op hoogte met die nuutste gebeure.

### TOELATING 2025: GRAAD 2 – 7

Op Dinsdag, 16 Julie 2024 is daar 'n brief in verband met bogenoemde aan elke ouer gestuur. Die personeelvoorsiening van Laerskool Newtonpark is afhanklik van ons jaarlikse inskrywings. Ons versoek u om asb. die skeurstrokie, onderaan daardie brief, te voltooi en onverwyld saam met R900 deposito (per kind) skool toe stuur of te EFT om sodoende te verseker dat u kind(ers) 'n plek het.

Die bedrag is voor/op 30 September 2024, betaalbaar. Hierdie bedrag is nie-terugbetaalbaar en sal dien as deel van die eerste betaling op u kind(ers) se skoolgelde vir 2025. Sodra die betaling ontvang word, sal u kind(ers) se inskrywing as afgehandel beskou word.

### SKOOLGELDE 2024

Die volgende wyses van betaling is beskikbaar: **maandelikse debietorder** oor 10 of 11 maande. (Januarie/Februarie – November en is opbetaalbaar voor/op 30 November 2024. 'n Debietorder kan slegs op 'n tjek-/spaar-/transmissierekening ingestel word.) U mag ook die **skoolgelde EFT**. Ons beskik ook oor 'n **kaartmasjien** by die skool wat u kan gebruik.

Op die verwysing van die inbetaling moet u asseblief die rekeningnommer en u kind se van en naam verskaf, en u bewys van betaling aan [fin@lnpark.co.za](mailto:fin@lnpark.co.za) e-pos.

**Alle graad R-gelde is maandeliks vooruitbetaalbaar en nasorggelde is kwartaalliks streng vooruitbetaalbaar.** Geen verligting word ten opsigte van hierdie dienste toegestaan nie, aangesien hierdie aktiwiteite deel van die skool se vrywillige program is.

Die betaling van skoolgelde is 'n wetlike verpligting (Staatskoerant no. 29311). Indien u in gebreke bly om u skoolgelde te betaal, sal dit wetlik afgedwing word.

### ELEKTRONIESE BETALINGS

Op die verwysing van die inbetaling moet u asseblief die rekeningnommer en u kind se van en naam verskaf. U moet ook die bewys van betaling per e-pos aan [fin@lnpark.co.za](mailto:fin@lnpark.co.za) stuur.

REKENINGNAAM	<b>LAERSKOOL NEWTONPARK</b>
BANK	<b>ABSA</b>
REKENINGNOMMER	<b>1400490089</b>
TAKKODE	<b>632005</b>

## GEDAGTE VIR DIE WEEK



Geniet die naweek saam met jul kinders.

SKOOLHOOF

E-pos: [skoolhoof@lnpark.co.za](mailto:skoolhoof@lnpark.co.za)

Tel : 0846935318

## ALGEMEEN

### BELANGRIKE DATUMS VIR VOLGENDE WEEK:

Die volgende datums moet u asseblief op u kalender aanteken:

- Ma – 16 September : Klerewinkel: **07:30 tot 12:00**  
Leesreuse balkies ingee  
**Graad 7-toer**
- Di – 17 September : Senior Koor: **07:25 tot 08:00**  
Bybelkennis skryf  
Beheerliggaamvergadering : **17:00**  
**Graad 7-toer**
- Wo – 18 September : Junior Koor: **07:30 tot 08:00**  
Klerewinkel: **12:00 tot 14:30**  
Eietydse Geskiedenis skryf  
**Graad 7-toer**
- Do – 19 September : Senior Koor: **07:25 tot 08:00**  
Begroting ter insae by Mev. E. Laas  
**Louis Loock Koorfees : Seniorskoor**  
**Graad 7-toer**
- Vr – 20 September : Klerewinkel: **07:30 tot 12:00**  
Junior Koor: **07:30 tot 08:00**  
Deel rapporte uit graad R tot 7  
**SKOOL SLUIT 10:00**  
**Graad 7-toer**

# SPORT EN KULTUUR

## TENNIS

Ruan Hanekom (gr. 3), Kean Kloppers (gr. 4), Elmer Kloppers en Christiaan van Rooyen (gr. 5), Buchner Ferreira en Matthew Watson (gr. 6), Rohan Maartens en James Watson (gr. 7) het aan 'n tennistoernooi te Port Alfred deelgeneem. Die Saterdag het hul teen o/15 spanne van Marlow en Port Alfred gespeel en hul baie goed van hul taak gekwyd. Die Sondag het hul ook teen 'n baie sterk span van Kenton meegeding. Dit was 'n wonderlike ondervinding vir ons Newton-tennissterre!



## ATLETIEK : EPA LAERSKOLE-LIGA

Riano Botha in graad 5D het op 7 September aan die EPA Track & Field school league 1 by die Oval vir seuns gewigstoot 0/11 deelgeneem waar hy 'n 3de plek verower het. Baie geluk, Riano!



## BINNEHUISE-NETBAL

'n Paar van ons graad 2-meisies, "The Powerpuff Girls", het op 7 September aan hulle eerste binnehuise somers-netballiga deelgeneem en die wedstryd teen die "Net-Skills", 5 – 4 gewen. Baie geluk, julle!



## JUDO

Dentin Maritz in graad 3S het op 7 September aan die Nelson Mandela Bay Judo-kompetisie deelgeneem en 'n goue medalje verower. Baie geluk, Dentin!



## KARATE

Lacey van Rensburg in graad 5D het op 7 September aan die "Youth Karate Challenge" deelgeneem en 'n brons medalje vir haar Kumite verwerf. Baie geluk, Lacey!

## BINNEHUISE KRIEKET : OP-SPAN 2025

Hartlik geluk aan Ethan Koen in graad 7O en Stefan Spinks in graad 6W wat tot die 0/14 OP-binnehuisekrieketspan verkies is wat die Oos-Kaap in 2025 by die "Inter-provincial tournament" wat van 30 Maart tot 5 April 2025 plaasvind, te verteenwoordig.





# Laerskool Newtonpark



Gestig 1926

## **BEHEERLIGGAAMPOS**

### **Internskap vir mansstudent wat 'n afstandsonderrig kursus volg:**

B.ED Graad (4 jaar): Intermediêr- en seniorfase

(Onderrigmedium: Afrikaans)

Meld buitemuurse ervaring / belangstellings

Aanvangsdatum vanaf 1 Januarie 2025

Taal van onderrig: Afrikaans

### **Voorkeur sal gegee word aan:**

- ▶ Tweedejaarstudent vir 2025.
- ▶ Persone met goeie akademiese resultate in Graad 12 of na skool behaal het.

### **Voordele vir die suksesvolle kandidaat:**

- ▶ Goeie mentorskap deur ervare onderwysers
- ▶ Professionele opleiding in 'n goed georganiseerde werksomgewing
- ▶ Deelname aan 'n verskeidenheid van buitemuurse aktiwiteite
- ▶ Finansiële bydrae tot studiekostes
- ▶ Maandelikse toelaag

**Om aansoek te doen vir hierdie internskap, kan belangstellendes die aansoekvorm van die skool se webwerf aflaai.** Direkte skakel na hierdie aansoekvorm:

[https://laerskoolnewtonpark.co.za/bfd\\_download/aansoekvorm-vir-internskap/](https://laerskoolnewtonpark.co.za/bfd_download/aansoekvorm-vir-internskap/)

Die voltooide aansoekvorm en vereiste stawende dokumente moet by Laerskool Newtonpark (h/v Vierdelaan en Willetstraat, Newtonpark) ingedien word of kan per e-pos gestuur word aan: [skoolhoof@lnpark.co.za](mailto:skoolhoof@lnpark.co.za)

Kontak die skool indien jy enige vrae het.

- **Slegs persone wat na die onderhoud genooi word, sal gekontak word.**
- **Die persone wat genooi word vir die onderhoud, moet 'n Polisieklaringsbewys indien by die onderhoud.**
- **Die beheerliggaam behou homself die reg voor om nie die pos te vul nie.**

**Sluitingsdatum: 2 Oktober 2024 (12:00)**